

प्रादेशिक समाचार एकांश  
आकाशवाणी रायपुर (छत्तीसगढ़)  
प्रादेशिक समाचार बुलेटिन  
(छत्तीसगढ़ी)

18.10 बुधवार

दिनांक 10.12.2025

\*\*\*\*\*  
\*\*\* प्रमुख समाचार –

- 1— मुख्यमंत्री के अगुवाई में आज मंत्रिमंडल के बैठका में ले गीस कतकोन फइसला—आत्मसमर्पित नक्सली मनके विरुद्ध दरज प्रकरण के समीक्षा अउ परीक्षण खातिर उप समिति के गठन ल देहे मंजूरी।
- 2— आज वीरनारायण सिंह के शहादत दिवस के मउका में ओमन के गृहग्राम सोनाखान में करे गीस कारीकरम के आयोजन – मुख्यमंत्री होइन सामिल।
- 3— मुख्यमंत्री ग्रामीण बस योजना के दूसर चरण आज ले सुरू – मुख्यमंत्री ह वर्चुअल, हरा झंडी दिखाके करीन रवाना।

अब समाचार विस्तार ले .....

### मंत्रिमंडल निर्णय

मुख्यमंत्री विष्णुदेव साय के अगुवाई में आज रईपुर में राखे गे राज्य मंत्रिमंडल के बैठका में कतकोन फैसला ले गीस। बैठका के बाद पत्रकार मन ले गोठबात करत उपमुख्यमंत्री अरुण साव ह बतईन कि मंत्रिपरिषद ह आत्मसमर्पित नक्सली मनके विरुद्ध दरज प्रकरण के समीक्षा अउ परीक्षण खातिर उप समिति के गठन ल मंजूरी देहे। ए समिति परीक्षण के बाद प्रकरण ल मंत्रिपरिषद के आगू प्रस्तुत करही। ए फइसला छत्तीसगढ़ शासन कोति ले जारी छत्तीसगढ़ नक्सलवादी आत्मसमर्पण—पीड़ित राहत पुनर्वास नीति के प्रावधान के अनुरूप हे। श्री साव ह बतईन कि आत्मसमर्पित नक्सली मनके प्रकरण वापसी बर जिला स्तरीय समिति के गठन के प्रावधान करे गेहे। ए समिति आत्मसमर्पित नक्सली मनके आपराधिक प्रकरण के वापसी बर रिपोर्ट पुलिस मुख्यालय ल दीहीं।

एखर संगेसंग मंत्रिपरिषद ह चौदह ठिन अधिनियम में संशोधन बर छत्तीसगढ़ जन विश्वास विधेयक के द्वितीय संस्करण के प्रारूप के अनुमोदन करे हे। छत्तीसगढ़, देस के पहिली अइसन राज्य होही, जिहां जन विश्वास विधेयक के द्वितीय संस्करण लाय जात हे।

मंत्रिपरिषद के बैठका में प्रथम अनुपूरक अनुमान बछर दू हजार पच्चीस—छब्बीस के विधानसभा में उपस्थापन संबंधी छत्तीसगढ़ विनियोग विधेयक के अनुमोदन घोले करे गीस।

### यूनेस्को—दीपावली

दीपावली ल यूनेस्को के मानवता के अमूर्त सांस्कृतिक विरासत के प्रतिनिधि सूची में दर्ज करे गेहे। आज नई दिल्ली के लालकिला में राखेगे यूनेस्को अंतर सरकारी समिति के बीसवां सत्र के दउरान एखर ले जुड़े सिलालेख ल केंद्रीय संस्कृति मंत्री गजेन्द्र सिंह शेखावत अउ यूनेस्को के एक सौ चौरानवे सदस्य देस के प्रतिनिधि मन अउ अंतर्राष्ट्रीय बिसेसज्ञ मनके मौजूदगी में अपनाय गीस।

### रेल परियोजना—लोकसभा

रेलमंत्री अश्विनी वैष्णव ह आज लोकसभा म दुरुग सांसद विजय बघेल डहार ले पूछे गे प्रश्न के जवाब देवत छत्तीसगढ़ म रेल अउ संरचना ल मजबूत बनाय बर केंद्र सरकार के प्रतिबद्धता ल दोहराइन हे।

रेलमंत्री ह बतइन कि राज्य म पाछू तीन बछर ये पांच हजार सात किलोमीटर म सर्वे के काम सुरु करे गेहे। राज्य म खरसिया-नवा रईपुर- परमालकसा, रावघाट-जगदलपुर, गेवरा रोड-पेण्ड्रा रोड, बिलासपुर-झारसुगुड़ा जइसे कतकोन परियोजना म काम चलत हे।

### वीरनारायण सिंह-शहादत दिवस

आज स्वतंत्रता सेनानी वीरनारायण सिंह के शहादत दिवस मनाय जात हे। ए बेरा म बलौदाबाजार भाटापारा जिला म उंखर गृहग्राम सोनाखान म कतकोन कारीकरम के राखे गीस। ए कारीकरम के माई पहुना मुख्यमंत्री विष्णुदेव साय रिहीन। ए मउका म मुख्यमंत्री ह शहीद वीर नारायण सिंह के चित्र म फूलमाला चढ़ाइन। एखर संगेसंग कतकोन विकास काम के लोकार्पण अउ भूमिपूजन घलो करीन।

एखर पहिली, मुख्यमंत्री ह आज राजधानी रईपुर के जयस्तंभ चौक पहुंच के वीर नारायण सिंह के प्रतिमा म फूलमाला चढ़ाइन। श्री साय ह किहीन कि वीर नारायण सिंह के जीवन त्याग, साहस अउ न्याय के मिसाल हे।

राज्यपाल रमेन डेका ह घलो आज लोकभवन म स्वतंत्रता सेनानी अमर शहीद वीर नारायण सिंह के फोटू उपर फूल चढ़ाके ओमन के बलिदान के सुरता करीन।

### मुख्यमंत्री ग्रामीण बस योजना

मुख्यमंत्री ग्रामीण बस योजना के दूसर चरण आज से सुरु हगे हे। मुख्यमंत्री विष्णुदेव साय ह आज रईपुर ले ए योजना के वर्चुअल सुभारंभ करत बस ल हरियर झंडी दिखाके रवाना करीन। दूसर चरण म बस्तर अउ सरगुजा संभाग के दस जिला के तेईस टिन रद्दा म चौबीस टिन नवा बस चलाए जाही। एखर ले एक सौ अस्सी गांव सोज्झे बस सुबिधा ले जुड़ गेहे।

ए मउका म मुख्यमंत्री ह किहीन कि ग्रामीण बस योजना न केवल परिवहन सुबिधा ल बढ़ावत हे, भलुक गांव ल सहर अउ सेवा संस्थान ले जोड़त सामाजिक अउ आर्थिक समानता म मजबूती देवत हे।

उहें, परिवहन मंत्री केदार कश्यप ह बतईन कि ए योजना बिसेस रूप ले बस्तर अउ सरगुजा के जनजातीय बहुल क्षेत्र बर एक वरदान साबित होही।

### एसआईआर

मतदाता सूची के विशेष गहन पुनरीक्षण अभियान-एसआईआर के गणना प्रपत्र ल जमा करे के आखिरी दिन काली ग्यारा दिसंबर हे। मुख्य निर्वाचन पदाधिकारी कार्यालय ले मिले जानकारी के अनुसार छत्तीसगढ़ म अब तक प्राप्त लगभग सबो गणना प्रपत्र के डिजीटलीकरण करे जा चुके हे।

### रक्षक पाठ्यक्रम-एमओयू

छत्तीसगढ़ राज्य बाल अधिकार संरक्षण आयोग अउ प्रदेश के छह टिन विश्वविद्यालय के बीच रक्षक पाठ्यक्रम बर समझौता ज्ञापन म दस्तखत करे गीस। ए मउका म मुख्यमंत्री विष्णुदेव साय मौजूद रिहीन। बाल अधिकार अउ संरक्षण म आधारित ए पाठ्यक्रम देस म अपन किसम के पहिली सैक्षणिक नवाचार हवय।

ए बेरा म मुख्यमंत्री ह किहीन कि रक्षक पाठ्यक्रम पढ़इया लइका मनके सुरक्षित भविष्य बनाए म महत्ता के भूमिका निभाही। ओमन किहीन कि ए पाठ्यक्रम युवा मन ल न सिरिफ रोजगार के मउका दिही, भलुक बाल अधिकार संरक्षण के क्षेत्र म जरूरी जानकारी घलो बढ़ाही। मुख्यमंत्री ह रक्षक पाठ्यक्रम ल तय बेरा म तियार करे अउ विश्वविद्यालय म ऐला लागू करे बर राज्य बाल अधिकार संरक्षण आयोग के अध्यक्ष डाक्टर वर्णिका शर्मा अउ उंखर टीम ल बधई दीन।

एक बछर के ये स्नातकोत्तर पाठ्यक्रम रईपुर के पंडित रविशंकर शुक्ल विश्वविद्यालय, कुशाभाऊ ठाकरे पत्रकारिता अउ जनसंचार विश्वविद्यालय, आंजनेय विश्वविद्यालय, एमिटी विश्वविद्यालय अउ सरगुजा के संत गहिरा गुरु विश्वविद्यालय के संगेसंग भिलई-दुरुग के श्री शंकराचार्य प्रोफेसनल यूनिवर्सिटी म सुरु होही।

## माओवादी आत्मसमर्पण

कांकेर जिला म आज दू महिला समेत चार झिन माओवादी मन ह आत्मसमर्पण करीन हे। ए सबो माओवादी मन उपर तेईस लाख रुपिया के इनाम घोषित रिहीस। जिला के वरिष्ठ पुलिस अधीक्षक आई.के. एलेसेला ह बतइन कि आत्मसमर्पण करइया माओवादी मन उपर आने-आने घटना म सामिल रहे के आरोप हे।

समाज के मुख्यधारा म लहुटइया माओवादी कैंडर ह भारतीय संविधान म आस्था जतात लोकतांत्रिक बेवस्था म सम्मानजनक अउ सुरक्षित जीवन जीये के संकल्प लीन। आत्मसमर्पण करइया हरेक माओवादी ल राज्य सरकार के पुनर्वास नीति के तहत पचास-पचास हजार रुपिया के प्रोत्साहन राशि दे गीस।

इही बीच, महाराष्ट्र के गढ़चिरौली जिला म घलो ग्यारह झिन माओवादी मन ह आत्मसमर्पण करीन हे। एखर मन उपर कुल नवासी लाख रुपिया के इनाम घोषित रिहीस।

## बस्तर ओलंपिक-संभाग स्तरीय प्रतियोगिता

बस्तर ओलंपिक के तहत जगदलपुर म काली ले संभाग स्तरीय प्रतियोगिता सुरु होही। ए प्रतियोगिता के उदघाटन काली बिहनिया ग्यारह बजे प्रियदर्सनी स्टेडियम म होही। उदघाटन समारोह के मउका म राज्य के उपमुख्यमंत्री विजय शर्मा अउ अरुण साव मौजूद रइही। ए समारोह म स्थानीय सांसद, विधायक अउ आने गणमान्य मनखे घलो सामिल होही।

तीन दिवसीय ए प्रतियोगिता म जिला स्तरीय प्रतियोगिता के करीबन तीन हजार विजेता खिलाड़ी भाग लिही। ऐमा करीबन पांच सौ नक्सल पीड़ित अउ पुनर्वासित नक्सली घलो सामिल होहीं। प्रतियोगिता म एथलेटिक्स, तीरंदाजी, बैडमिंटन, फुटबॉल, हॉकी, वेटलिफ्टिंग, कराटे, कबड्डी, खो-खो, व्हालीबॉल अउ रस्साखींच के मुकाबला होही, जेमा जितइया मन ल सम्मानित करे जाही।

## गाईडलाइन दर

केन्द्रीय मूल्यांकन बोर्ड कोति ले मंजूर नवा गाईडलाइन दर ल लेके राज्य सरकार ह बताय हे कि नवा गाईडलाइन दर जादा सरल अउ वैज्ञानिक हवय। उहें, पाछु कई बछर ले चले आत विसंगति ल दूर करे के परयास करे गेहे। सरकार ह बताए हे कि कुछेक जघा म ए भरम फैलाए जात हे कि गाईडलाइन दर म जादा बढ़वार करे गेहे या दस्तावेज पंजीयन के काम बाधित हगे हे। फेर सही बात ए हे कि नवा गाईडलाइन दर बीस नवंबर ले परभावी हगे हे अउ ए बेरा म कांकेर जिला म करीबन अंटानवे दस्तावेज के पंजीयन हगे हे।

## गांजा-बरामद

रईपुर के तीर अभनपुर म पुलिस के टीम ह गाड़ी तलासी के बेरा एक ठन गाड़ी ले करीबन सोलह किलो गांजा बरामद करे हे। एखर कीमत लगभग आठ लाख रुपिया बताय जात हे। पुलिस ह ए मामला म तीन झन आरोपी ल गिरफ्तार घलो करे हे।

\*\*\*\*\*